

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренцијски савјет*

**R J E Š E N j E**

**po Prijavi namjere koncentracije privrednog subjekta Prijedorputevi a.d.  
Prijedor i privrednog subjekta Kozaraputevi a.d. Banja Luka**

**Sarajevo**  
**Juni, 2008. godine**



Broj: 01-02-26-010-07-II/08  
Sarajevo, 12.06.2008. godine

Na osnovu člana 25. stav (1) tačka e), člana 42. stav (1) tačka d) i člana 43. stav (2), a u vezi sa čl. 12., 14., 16. i 18. Zakona o konkurenciji ("Službeni glasnik BiH", broj 48/05 i 76/07), rješavajući po Prijavi namjere koncentracije privrednog subjekta Prijedorputevi a.d., 27. juna 17, 79000 Prijedor, i privrednog subjekta Kozaraputevi a.d., Ive Andrića 10, 78 000 Banja Luka, pod brojem 01-02-26-010-II/08 dana 12.03.2008. godine, Konkurencijsko vijeće na 67. (šezdeseti i sedmoj) sjednici održanoj dana 11.06.2008. godine donijelo je

### **R J E Š E N J E**

1. Ocjenjuje se dopuštenom koncentracija koja će nastati na tržištu pružanja usluga izgradnje, održavanja i zaštite putne infrastrukture u Republici Srpskoj, sticanjem kontrole kupovinom većinskog paketa akcija u visini od 58,0507% u privrednom subjektu Kozaraputevi a.d., Ive Andrića 10, 78 000 Banja Luka, od strane privrednog subjekta Prijedorputevi a.d., 27. juna 17, 79000 Prijedor.
2. Zbog nepodnošenja Prijave namjere koncentracije u zakonom predviđenom roku, izriče se novčana kazna privrednom subjektu Prijedorputevi a.d., 27. juna 17, 79000 Prijedor, u visini od 25.000,00 KM, koju je dužan platiti u roku od 8 dana od prijema ovog Rješenja.
3. Ovo Rješenje je konačno i upisuje se u Registar koncentracija.
4. Ovo Rješenje bit će objavljeno u "Službenom glasniku BiH", službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Privredni subjekt Prijedorputevi a.d., 27. juna 17, 79000 Prijedor (u daljem tekstu: Prijedorputevi ili podnosilac Prijave) je podnio Konkurencijskom vijeću Prijavu namjere koncentracije (u daljem tekstu: Prijava), dana 12.03.2008. godine, kojom želi steći kontrolu nad privrednim subjektom Kozaraputevi a.d., Ive Andrića 10, 78 000 Banja Luka (u daljem tekstu: Kozaraputevi), kupovinom većinskog paketa akcija u visini od 58,0507% .

Uvidom u dostavljenu Prijavu, Konkurencijsko vijeće je utvrdilo da ista nije potpuna u smislu člana 30. Zakona o konkurenciji (u daljem tekstu: Zakon) i čl. 8. i 10. Odluke o načinu podnošenja prijave i kriterijimima za ocjenu koncentracije privrednih subjekata ("Službeni glasnik BiH", broj 95/06), te je u skladu sa članom 31. Zakona, zatražilo dopunu Prijave, dopisom broj 01-02-26-010-1-II/08, dana 02.04.2008. godine i dopisom broj 01-02-26-010-4-II/08 dana 15.04.2008. godine.

Podnosilac Prijave je u skladu sa zahtjevima Konkurencijskog vijeća dopunio Prijavu dopisom broj 01-02-26-010-3-II/08, dana 14.04.2008. godine i dopisom broj 01-02-26-010-5-II/08 dana 28.04.2008. godine.

Dostavljanjem tražene dokumentacije Konkurencijsko vijeće je utvrdilo da je Prijava kompletna i uredna te je izdalo Potvrdu o prijemu kompletne i uredne Prijave, u skladu sa članom 30. stav (3) Zakona, dana 26.05.2008. godine pod brojem 01-02-26-010-6-II/08.

Podnosilac Prijave je naveo, da u smislu člana 30. stav (2) Zakona, nije podnio zahtjev za ocjenu koncentracije, ni jednom drugom tijelu ovlaštenom za ocjenu koncentracije, izvan teritorije Bosne i Hercegovine.

Prijava namjere koncentracije nije podnesena u roku od 8 dana u smislu člana 16. stav (1) Zakona s obzirom da je Ugovor o kupovini akcija u privrednom subjektu „Kozaraputevi“ a.d. Banja Luka zaključen dana 28.02. 2008. godine, a Prijava podnesena 12.03. 2008. godine.

Konkurencijsko vijeće je u postupku ocjene Prijave namjere koncentracije utvrdilo slijedeće činjenice:

## **1. Učesnici koncentracije**

Učesnici predmetne koncentracije su privredni subjekti: Našicecement d.d., Tajnovac 11, 3150 Našice, Republika Hrvatska (u daljem tekstu: Našicecement) i Prijedorputevi a.d., 27. juna 17, 79000 Prijedor (u daljem tekstu: Prijedorputevi) i Kozaraputevi a. d., Ive Andrića 10., 78000 Banja Luka (u daljem tekstu: Kozaraputevi).

### **1.1. Privredni subjekt Našicecement d.d.,**

Privredni subjekt Našicecement registrovan je dana 18.01.1996. godine u registru kod Trgovačkog suda u Osijeku, pod registarskim brojem 050006535.

Osnovna djelatnost privrednog subjekta Našicecement je proizvodnja cementa i druga je po veličini tvornica cementa u Republici Hrvatskoj. Vlasnik privrednog subjekta Našicecement je Nexe d.d sa (..)\*<sup>1</sup> akcija.

Nexe d.d. čini 26 privrednih subjekata i predstavlja jednog od najznačajnijih privrednih subjekata u regionu iz oblasti proizvodnje građevinskog materijala. Nexe d.d. posluje pod tim imenom od 1. marta 2003. godine, sjedište je u Našicama i djeluje na području Republike Hrvatske, Bosne i Hercegovine i Srbije.

Prije potpisivanja Ugovora o kupoprodaji akcija u privrednom subjektu „Kozaraputevi“ a.d. Banja Luka, kao pravnog osnova predmetne koncentracije, privredni subjekt Našicecement je bio vlasnik 58,06% akcija u privrednom subjektu Kozaraputevi.

### **1.2. Privredni subjekt Prijedorputevi a.d.,**

Privredni subjekt Prijedorputevi registrovan je dana 12.10.2001. godine u Osnovnom sudu u Banja Luci, pod registarskim brojem 1-232-00.

Osnovna djelatnost privrednog subjekta Prijedorputevi je izgradnja, održavanje i zaštita putne infrastrukture.

Vlasnička struktura privrednog subjekta Prijedorputevi je sljedeća:

1. Fizičko lice Čorokalo Dragan, (..)\*, Prijedor, (..)\* udjela u osnovnom kapitalu,
2. Fond za penzijsko i invalidsko osiguranje RS, Njegoševa 28A, Bijeljina, (..)\* udjela u osnovnom kapitalu,
3. Fond za restituciju RS A.D., Mladena Stojanovića 7, Banja Luka, (..)\* udjela u osnovnom kapitalu,
4. Polara invest fond A.D., Gundulićeva 4, Banja Luka (..)\* udjela u osnovnom kapitalu,
5. Ostali dioničari, (..)\* udjela u osnovnom kapitalu.

---

<sup>1</sup> (..)\* podaci se smatraju poslovnom tajnom u smislu člana 38. Zakona o konkurenciji

Povezana društva privrednog subjekta Prijedorputevi su:

1. Privredni subjekt "Japra" a.d. Novi Grad u kojem privredni subjekt Prijedorputevi je vlasnik (..)\* akcija sa pravom glasa, a zajedno sa povezanim licem Čorokalo (Uroš) Draganom ukupno kontroliše (..)\* akcija sa pravom glasa,
2. Privredni subjekt "Industroprojekt" a.d. Prijedor u kojem privredni subjekt Prijedorputevi je vlasnik (..)\* akcija sa pravom glasa,
3. Privredni subjekt "Livnica" a.d. Ljubija u kojem privredni subjekt Prijedorputevi je vlasnik (..)\* akcija sa pravom glasa, a zajedno sa povezanim licem Čorokalo (Uroš) Draganom, kontroliše ukupno (..)\* akcija sa pravom glasa
4. Privredni subjekt Prijedorputevi je vlasnik (..)\* udjela u osnovnom kapitalu privrednog subjekta Ilidžaputevi d.o.o., Vojkovići, Istočna Ilidža.

### 1.3.Privredni subjekt Kozaraputevi a.d.

Privredni subjekt Kozaraputevi a.d., Ive Andrića 10., 78000 Banja Luka, je registrovan dana 03.09.2001.godine u Osnovnom sudu u Banja Luci, pod registarskim brojem 1-234-00.

Osnovna djelatnost privrednog subjekta Kozaraputevi je izgradnja putne infrastrukture, aerodromskih pista i sportskih terena.

Vlasnička struktura privrednog subjekta Kozaraputevi prije potpisivanja Ugovora o kupoprodaji akcija u „Kozaraputevi" a.d. Banja Luka, je sljedeća :

1. Privredni subjekt "Našicecement" d.d., Našice, Republika Hrvatska, (..)\* udjela u osnovnom kapitalu,
2. Privredni subjekt "Prijedorputevi" a.d. Prijedor, (..)\* udjela u osnovnom kapitalu,
3. Fond za penzijsko i invalidsko osiguranje RS, Njegoševa 28A, Bijeljina, (..)\* udjela u osnovnom kapitalu,
4. Fond za restituciju RS, Mladena Stojanovića 7, Banja Luka, (..)\* udjela u osnovnom kapitalu,
5. Ostali dioničari (..)\* udjela u osnovnom kapitalu.

Privredni subjekt Kozaraputevi je osnivač i vlasnik (..)\* udjela u privrednom subjektu "Nexe agregati" d.o.o., Ljubačavo bb, Banja Luka, čiji je osnovi predmet poslovanja vađenje kamena za građevinarstvo.

## 2. Ukupan godišnji prihod učesnika predmetne koncentracije

Analizom podataka navedenih u Prijavi, Konkurencijsko vijeće je utvrdilo da su učesnici koncentracije po završnom računu u 2007. godini, kao finansijskoj godini koja je prethodila koncentraciji ostvarili slijedeći ukupni prihod, i isti je naveden u Tabeli 1.

Tabela 1.

Ukupan prihod (u KM)	Našicecement	Prijedorputevi	Kozaraputevi
Svjetski prihod	(..)*	-	-
BiH	(..)*	(..)*	(..)*

Na osnovu podataka o ukupnom ostvarenom prihodu učesnika predmetne koncentracije utvrđeno je postojanje obaveze Prijave namjere koncentracije, obzirom da su ispunjeni kriterijumi ukupnog ostvarenog prihoda privrednih subjekata, učesnika predmetne koncentracije na tržištu roba i/ili

usluga na svjetskom tržištu i na tržištu Bosne i Hercegovine, u godini koja je prethodila predmetnoj koncentraciji u smislu člana 14. Zakona.

## 2. Pravni osnov i oblik koncentracije

Pravni osnov predmetne koncentracije je Ugovor o kupoprodaji akcija u privredni subjekt „Kozaraputevi“ a.d. Banja Luka (u daljem tekstu: Ugovor), zaključen dana 28.02.2008. godine između privrednog subjekta Našicecement d.d., Tajnovac 1, 3150 Našice, Republika Hrvatska, zastupanog po punomoćniku, gospodinu Oto Ostoviću, (..)\*, 31500 Našice, Hrvatska, JMBG (..)\* i privrednog subjekta Prijedorputevi a.d., 27. juna 17, 79000 Prijedor, zastupanog po Ranku Simiću JMBG (..)\*, LK broj (..)\*.

Navedenim Ugovorom, privredni subjekt Prijedorputevi namjerava steći kontrolu nad privrednim subjektom Kozaraputevi, kupovinom većinskog paketa akcija u iznosu od 58,0507%, koje su bile u vlasništvu privrednog subjekta Našicecement.

Nakon realizacije navedenog Ugovora, privredni subjekt Prijedorputevi postaće vlasnik većinskog paketa akcija u iznosu od 81,716 %, u privrednom subjektu Kozaraputevi, obzirom da je prije potpisivanja Ugovora od 28.02.2008.godine, kao pravnog osnova predmetne koncentracije, dana 26.02.2008. godine stekao 23,666% akcija u privrednom subjektu Kozaraputevi, potpisivanjem Ugovora o kupoprodaji akcija u "Kozaraputevi", sa fizičkim licem Stojanović Željkom.

Nakon završenog preuzimanja i sticanja većinskog paketa akcija u iznosu od 81,716% akcija, privredni subjekt Prijedorputevi će preuzeti nadzor i kontrolu nad organima uprave u privrednom subjektu Kozaraputevi.

Pravni oblik predmetne koncentracije predstavlja sticanje kontrole ili preovladavajućeg uticaja jednog privredniog subjekta na drugim privrednim subjektom i to sticanjem kupovinom većine dionica ili udjela osnovnog kapitala u skladu sa članom 12. stav 1) tačka b) pod 1) Zakona.

## 3. Analiza relevantnog tržišta

Članom 3. Zakona i čl. 4., 5. i 6. Odluke o utvrđivanju relevantnog tržišta ("Službeni glasnik BiH", broj 18/06) određeno je relevantno tržište određenih proizvoda ili usluga koje su predmet djelovanja privrednih subjekata na relevantnom geografskom tržištu.

Konkurencijsko vijeće je utvrdilo, da je relevantno tržište proizvoda ili usluga, učesnika predmetne koncentracije tržište pružanja usluga izgradnje, održavanja i zaštite putne infrastrukture.

Relevantno geografsko tržište za ovu koncentraciju je Republika Srpska, jer se usluge izgradnje, održavanja i zaštite putne infrastrukture obavljaju na teritoriji Republike Srpske.

Slijedom navedenog, Konkurencijsko vijeće je kao relevantno tržište za predmetnu koncentraciju utvrdilo tržište pružanja usluga izgradnje, održavanja i zaštite putne infrastrukture na teritoriji Republike Srpske.

Prema podacima iz Prijave, tržišni udjeli učesnika koncentracije i glavnih konkurenata na relevantnom tržištu pružanja usluga izgradnje, održavanja i zaštite putne infrastrukture su:

Tabela 2.

Red.br.	Konkurenti	Tržišni udio u %
1.	"Integralinžinjering"d.o.o.Laktaši	32,00
2.	"Prijedorputevi"a.d.Prijedor"	7,80
3.	"Niskogradnja"d.o.o.Laktaši	7,41
4.	"Bijeljnaputevi"a.d.Bijeljina	7,00

5.	"Hidroinženjering"	6,00
6.	"Mrkonjićputevi"a.d.Mrkonjić Grad	4,00
7.	<b>"Kozaraputevi"a.d.Banja Luka</b>	<b>2,00</b>
8.	<b>„Iliđaputevi“ d.d.o. I. Iliđža</b>	<b>0,20</b>
9.	Ostali	33,59
	<b>Ukupno:</b>	<b>100,00</b>

Analizom podataka (Tabela 2.), proizilazi da na tržištu pružanja usluga izgradnje, održavanja i zaštite putne infrastrukture u Republici Srpskoj najveći tržišni udio ima privredni subjekt "Integralinženjering"d.o.o. Laktaši od 32,00%, dok učesnici predmetne koncentracije zajedno imaju tržišni udio od 10,00%.

Konkurencijsko vijeće je utvrdilo da postoji značajna konkurencija na relevantnom tržištu, što je pretpostavka djelovanja slobodne konkurencije, te nepostojanje zakonskih i administrativnih barijera za ulazak potencijalnih konkurenata na relevantno tržište.

#### 4. Procjena koncentracije

Konkurencijsko vijeće je nakon izvršene analize utvrdilo da provođenjem namjeravane koncentracije neće doći do značajne promjene tržišnih udjela učesnika koncentracije na relevantnom tržištu u Republici Srpskoj.

Slijedom navedenog, Konkurencijsko vijeće je utvrdilo da je tržišni udio učesnika predmete koncentracije znatno ispod praga od 40%, kojim se pretpostavlja da privredni subjekt može imati dominantni položaj, u smislu člana 9. Zakona.

Predmetna koncentracija mogla bi imati pozitivne efekte na relevantnom tržištu Republike Srpske, u smislu smanjenja cijena usluga, povećanja kvaliteta usluga, unošenja inovacija, te povećanja i proširivanja mogućnosti izbora proizvoda i/ili usluga za potrošače.

Konkurencijsko vijeće je analizom podataka, u smislu člana 17. Zakona (posebno strukture relevantnog tržišta, tržišnih udjela učesnika koncentracije i konkurenata) utvrdilo da predmetna koncentracija ne sprečava, ograničava niti narušava tržišnu konkurenciju na relevantnom tržištu pružanja usluga izgradnje, održavanja i zaštite putne infrastrukture u Republici Srpskoj.

Uzimajući u obzir iznesene činjenice i podatke koji su prethodili donošenju odluke, Konkurencijsko vijeće je ocijenilo predmetnu koncentraciju dopuštenom, u smislu člana 18. stav (2) tačka a) Zakona, kao što je odlučeno u dispozitivu ovog rješenja.

Konkurencijsko vijeće konstatuje i činjenicu da je predmetna koncentracija provedena prije donošenja rješenja iako je to suprotno članu 18. stav 8) Zakona.

#### 5. Novčana kazna

Konkurencijsko vijeće je ocijenilo da predmetna koncentracija predstavlja koncentraciju u smislu člana 12.stav (1) tačka b) pod 1) Zakona, te je podnosilac Prijave, bio dužan u vremenskom roku od osam dana od dana zaključivanja predmetnog Ugovora dostaviti Prijavu, u skladu sa članom 16. stav (1) Zakona.

Imajući posebno u vidu navedene odredbe Zakona i nakon uvida u dostavljenu dokumentaciju, Konkurencijsko vijeće je utvrdilo postojanje povrede člana 16. stav (1) Zakona od strane podnosioca Prijave, jer je isti Prijavu namjere koncentracije podnio sa zakašnjenjem od 3 dana.

Konkurencijsko vijeće, u smislu člana 49. stav (1) tačka b) Zakona može izreći novčanu kaznu do 1% od ukupnog prihoda iz prethodne godine poslovanja podnosiocu Prijave, za kršenje odredbi člana 16. stav (1) Zakona.

Konkurencijsko vijeće je izreklo novčanu kaznu privrednom subjektu Prijedorputevi u iznosu od 25.000,00 KM, što predstavlja (..)\* ukupnog ostvarenog godišnjeg prihoda u 2007. godini.

#### **6. Administrativna taksa**

Na ovo Rješenje Podnosilac prijave u skladu sa Odlukom o administrativnim taksama u vezi sa procesnim radnjama pred Konkurencijskim vijećem ("Službeni glasnik BiH", broj 30/06) i u skladu sa članom 2. Tarifni broj 107 stav (1) tačka d) pod 1) obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

#### **6. Pouka o pravnom lijeku**

Protiv ovog Rješenja nije dozvoljena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

**Predsjednik**

**Ibrica Lakišić**